



SIARAN MEDIA

HIJAUKAN PANTAI, LINDUNGI KOMUNITI: PAHANG PERKUKUH AGENDA KELESTARIAN

PEKAN, 11 Februari 2026 – Komitmen Kerajaan MADANI dalam memelihara alam sekitar terus diperkukuh menerusi Program Penghijauan Malaysia Bersama Komuniti dan Penyerahan Projek Pengawalan Hakisan Pantai di Kampung Tanjung Batu, Pekan, Pahang. Program ini telah diluncurkan oleh Yang Berbahagia Tan Sri Shamsul Azri bin Abu Bakar, Ketua Setiausaha Negara dan turut hadir bersama mewakili Kerajaan Negeri Pahang adalah Yang Hormat Dato' Ali Syahbana bin Sabaruddin, Timbalan Setiausaha Kerajaan Pahang (Pembangunan).

Program Penghijauan Malaysia: Kempen Penanaman 100 Juta Pokok 2021–2025 mencatat kejayaan membanggakan apabila sasaran nasional dicapai lebih awal dan telah melepasi jangkaan. Sehingga 31 Disember 2025, lebih 137 juta pokok melibatkan 2,091 spesies telah berjaya ditanam di seluruh negara.

Negeri Pahang merekodkan pencapaian cemerlang dengan penanaman sebanyak 13.4 juta pokok, jauh melebihi sasaran asal, sekali gus membuktikan kesungguhan Kerajaan Negeri serta sokongan padu rakyat terhadap agenda kelestarian alam sekitar. Malah, Pahang turut mencipta sejarah pada 2025 apabila menerima pengiktirafan *The Malaysia Book of Records* bagi penanaman spesies Hutan Paya Gambut terbesar di Malaysia. Bersempena program ini, sebanyak 500 anak pokok spesies pesisiran pantai iaitu Ketapang dan Rhu Pantai telah ditanam bersama komuniti setempat.

Dalam majlis yang sama, turut diadakan penyerahan Projek Pengawalan Hakisan Pantai Kampung Tanjung Batu, Nenasi kepada Kerajaan Negeri Pahang. Projek di bawah Kementerian Peralihan Tenaga dan Transformasi Air (PETRA) ini berjaya disiapkan lebih awal dan berperanan penting dalam melindungi kawasan pantai sepanjang 4.3 kilometer, sekali gus menjamin keselamatan penduduk, infrastruktur serta keseimbangan ekosistem pesisir pantai.

Terdahulu, Jabatan Perhutanan Negeri Pahang turut menganjurkan Program CEPA Penghijauan bersama pelajar-pelajar Tabika KEMAS Kampung Tanjung Batu dan Tabika KEMAS Taman Agropolitan. Melalui aktiviti mewarna, kuiz, permainan susun gambar alam sekitar dan penanaman pokok, program ini berazam menyemai kesedaran serta kecintaan terhadap hutan dan alam sekitar dalam kalangan kanak-kanak sejak usia awal melalui pendekatan pendidikan yang interaktif dan menyeronokkan.

JABATAN PERHUTANAN SEMENANJUNG MALAYSIA
11 FEBRUARI 2026



Unit Komunikasi Korporat dan Perhubungan Awam | Jabatan Perhutanan Semenanjung Malaysia
Tel: 03-2616 4488 | Faks: 03-2692 5657



JPSMOfficial